



Judah de Beer het sy terugkeer na die stoelmot ná 'n afwesigheid van byna vyf jaar met 'n silwermedalje by die Junior Afrika-kampioenskap in Marokko gevier. Foto: Verskaf

Plaaslike stoeiers ryg die medaljes in

Koos Venter

Plaaslike stoeiers was onder die uitblinkers in die Suid-Afrikaanse span wat onlangs met 18 medaljes van die Junior Afrika stoekampioenskap in Marokko teruggekeer het.

Die Suid-Afrikaanse span het uiteindelik die vierde plek ingeneem by die kampioenskap en onder die plaaslike deelnemers was dit veral die stoeiers van TuksStoei wat hul staal gewys het. Die 18 medaljes het vyf goud, nege silwer en vier bronsmedaljes ingesluit.

Edrich Nortjé van TuksStoei was een van die sterre. In die afdeling vir kadette onder 58kg het hy al sy gevegte gewen sonder om 'n enkele punt af te staan. Hy het boonop al sy opponente met valle geklop. Nortjé is na die toernooi deur die Verenigde Stoeifederasie van die Wêreld (UWW) uitgenooi om hul sogenaamde "Meer as Medaljes" oenkamp by te woon. Dié kamp sal ook in Marokko aangebied word.

Nóg 'n Tuks stoeier, Ruan Botha, het ook goud verower in die vrystyl-afdeling vir kadette o.85kg. Botha se oorwinning was soveel soeter, nadat hy verlede jaar nie aan hierdie byeenkoms kon deelneem nie, aangesien hy weens 'n besering moes onttrek.

Botha het ook die eindronde met 'n puik val beklink.

'n Ander Tuks stoeier met 'n merkwaardige verhaal om te vertel is Brandon Kidson. Nadat hy twee jaar gelede ophou stoei het, het hy verlede jaar met nuwe entoesiasme teruggekeer en sy harde werk is in Marokko beloon met die silwermedalje in die junior onder 58kg kategorie in die afdeling vir Grieks-Romeinse styl. Hy het valle behaal in al sy gevegte tot by die eindstryd,

waar hy net-net met 'n puntebeslissing verloor het.

Jaco le Roux van TuksStoei het ook as kadet gestoei en hy kon huis toe kom met die silwermedalje in die vrystyl-afdeling (onder 100kg) om sy nek.

Suid-Afrika se beste junior stoeier van 2016, Dylan Marais, het self TuksStoei se naam hoog gehou. Dié belowende jong stoeier, wat verlede jaar onder die top 10 in sy afdeling by die Junior Wêreldkampioenskap geëindig het, het met die silwermedalje vir vrystyl in die kategorie vir onder 86kg weggestap.

In die kategorie vir junior onder 97kg stoeiers het Judah de Beer ook silwer gewen, nadat hy teen die verdedigende Afrika kampioen verloor het in die eindstryd.

Kenners was beïndruk met De Beer se spoed en krag op die mat. De Beer het 'n paar jaar gelede reeds uitgetree as stoeier en het eers aan die begin van 2017 teruggekeer en weer begin oefen, wat sy prestasie in perspektief stel.

Leanco Stans was TuksStoei se enigste vroulike verteenwoordiger in die Suid-Afrikaanse span. Sy het 'n bronsmedalje verower in vrystyl in die kategorie vir onder 66kg. Daarmee het sy verbeter op haar vierde plek verlede jaar. Dié merkwaardige jong dame het haar vyfde Afrika kampioenskap bygewoon.

Stans het ook 'n beurs ontvang van die Verenigde Stoeifederasie van die Wêreld (UWW) om na Finland te reis, waar sy saam met sommige van Europa se beste vroulike stoeiers sal oefen ter voorbereiding vir die Olimpiese Spele van 2020. Stoeiers sal in Japan weer hul plek inneem, nadat dié sport afwesig was in Rio verlede jaar. Sy is die eerste vroulike stoeier van Afrika wat hierdie eer te beurt val.

Stoeiers van die TuksStoei klub was onder die uitblinkers by die onlangse Afrika kampioenskap in Marokko.



Ruan Botha van TuksStoei het goud verower in die vrystyl-afdeling vir kadette o.85kg by die Junior Afrika kampioenskap in Marokko. Foto: Verskaf

